

Pro e contra diagnostica da preimplantaziun

Votaziun federala partenent il Conclus davart la diagnostica da preimplantaziun

DA MARTIN CABALZAR

■ **Il conclus federal davart la midada da l'artitgel constituziunal davart la diagnostica da preimplantaziun preveda dastgar examinar geneticamain ils embryos avant che quels vegnan implantads en la madra d'ina dunna.** Tar pèrs che na survegnan betg uffants sin la via natirala u che han ina malsogna genetica dastgan ils medis ozendi fructifitgar artificialmain las cellas d'ov d'ina dunna. La lescha per la medischina da reproducziun vertenta scumonda dentant in'examinaziun genetica dals embryos avant che quels vegnan implantads en la madra. Da nov duai dentant questa diagnostica da preimplantaziun vegnir lubida.

Pia duain ils geniturs, che na pon betg survegnir uffants a moda natirala, avair la schanza da tuttina survegnir uffants. U pèrs che portan ina malsogna genetica duain dastgar survegnir uffants che n'èn betg pertutgads da questa malsogna.

Plinavant duai il dumber dals embryos che dastgan vegnir duvrads per la fructificaziun artificiala vegnir augmentada da trais sin 12 embryos. Ultra da quai duain ils embryos dastgar vegnir conservads per duvrar els pli tard.

Per che la diagnostica da preimplantaziun possa empermetter in tschert success sto l'artitgel constituziunal concernent la medischina da reproducziun vegnir adattà.

Las midadas curt e bun

– Examinaziun genetica dals embryos avant ch'implantar quels.

– 12 enstagl da trais embryos duain vegnir dastgads duvrads.
– Embrios dastgan vegnir conservads e duvrads pli tard.

Arguments persuerter

Entras la diagnostica da preimplantaziun duai vegnir prendì davent il squitsch a pèrs che na survegnan betg uffants sin la moda natirala.

– La diagnostica da preimplantaziun pussibilitescha a pèrs cun malsognas geneticas da survegnir uffants sauns.

– Cun dastgar eleger in embrio per la fructificaziun artificiala pon vegnir evitadas naschientschas da plurellins.

Arguments encunter

La vita umana cumenza gia cun la fructificaziun da la cella d'ov. Cun quai dispona in embrio da dignitad ed ha il dretg da viver.

– Il castgaun na duai betg intervegnir en la natira e na duai betg dastgar decider davart la vita u la mort d'in embrio.

– La diagnostica da preimplantaziun na garantescha betg che tut las malsognas ge-

neticas pon vegnir registradas e ch'in uffant saun naschia.

Recumandaziun dal parlament e dal cussegl federal

Il cussegl federal ed il parlament recumondan d'approvar il project da votaziun. En Svizra duain pèrs che han ina greva malsogna genetica dastgar survegnir uffants che n'èn betg pertutgads da la malsogna. Ultra da quai duain pèrs che na survegnan betg uffants sin la via natirala avair ina pli gronda schanza da survegnir in agen uffant.



Ina media che guarda sin cellas d'ov. KEYSTONE